

NO. SOALAN : 49

**PEMBERITAHUAN PERTANYAAN DEWAN RAKYAT YANG  
KETIGA BELAS, PENGGAL KELIMA, MESYUARAT KEDUA**

**PERTANYAAN : LISAN**

**DARIPADA : TUAN TONY PUA KIAM WEE  
[ PETALING JAYA UTARA ]**

**TARIKH : 25 Julai 2017 ( Selasa )**

**Tuan Tony Pua Kiam Wee [ Petaling Jaya Utara ]** minta **PERDANA MENTERI** menyatakan sebab FELDA masih ingin meneruskan pembelian saham Eagle High Plantation walaupun Laporan ‘due diligence’ oleh KPMG mendedahkan pelbagai masalah syarikat Eagle High, termasuk hutang terlampaui tinggi, defisit aliran tunai, penyata kewangan kurang tepat dan saiz ladang yang melampaui hak milik.

**JAWAPAN: YB DATO' RAZALI BIN IBRAHIM,**

**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, pelaksanaan pembelian pegangan 37% ekuiti dengan *Put Option* di dalam PT Eagle High Plantation Tbk (PT EHP) dilaksanakan oleh salah sebuah syarikat subsidiari milik penuh FELDA, iaitu FIC Properties Sdn Bhd (FICP). Pembelian pegangan ini adalah menurut dan selaras dengan *Memorandum and Articles of Association* FICP.

Faktor utama yang mempengaruhi keputusan FICP untuk melaksanakan pembelian ini adalah kerana ia selari dengan matlamat pelaburan jangka panjang FELDA untuk muncul sebagai pemain utama dan terbesar di dalam sektor minyak sawit global.

Selain itu, pelaburan ini juga dilihat akan memberi manfaat kepada kepentingan Malaysia, terutamanya dalam menyokong usaha strategik Malaysia-Indonesia berkaitan penubuhan dan pengukuhan pelaksanaan Piagam Penubuhan Majlis Minyak Negara-negara Pengeluar Minyak Kelapa Sawit (CPOPC) antara kedua-dua buah negara. Malaysia dan Indonesia telah menandatangani CPOPC pada bulan November 2015 yang bertujuan untuk mengukuhkan kerjasama dalam kalangan negara-negara pengeluar minyak kelapa sawit serta menangani isu-isu berkaitan minyak kelapa sawit. Dengan pemeteraian CPOPC tersebut, FELDA yang merupakan agensi kerajaan yang terlibat dalam sektor kelapa sawit telah diberi mandat oleh Kerajaan Malaysia untuk

mewujudkan hubungan perniagaan dengan kumpulan Rajawali di Indonesia bagi memacu agenda CPOPC.

Cadangan pelaburan FICP dalam EHP ini memainkan peranan penting dalam menyokong penubuhan CPOPC dan pelaburan tersebut adalah demi kepentingan Malaysia (*best interest of Malaysia*). Faedah pelaksanaan CPOPC kepada Malaysia adalah seperti berikut.

- i) Meningkatkan imej positif minyak sawit; dan
- ii) Menjadi satu platform kepada negara-negara penanam sawit bagi bekerjasama menangani isu-isu halangan perdagangan minyak sawit dan pembangunan industri sawit secara mapan.

Di samping itu, langkah strategik ini dapat memberi peluang kepada FELDA untuk mendapat akses kepada tanah di Indonesia di mana EHP memiliki kira-kira 320,000 hektar tanah termasuk 125,000 hektar yang sudah di tanam. Ini juga merupakan peluang terakhir bagi FICP dan Malaysia atau mana-mana pihak asing untuk membeli syarikat Indonesia yang mempunyai bank tanah yang luas.

Pelaburan tersebut juga membolehkan FELDA menembusi pasaran domestik Indonesia yang mempunyai 260 juta penduduk di mana melalui pembelian pegangan ekuiti ini, Kumpulan FELDA mempunyai potensi perniagaan baru dan sinergi dalam bidang semaian, baja, urusniaga minyak sawit mentah dan lain-lain aktiviti hiliran.

Bagi memastikan pelaburan dan kepentingan FELDA dan FICP terpelihara, FICP telah melaksanakan proses kajian terperinci (*due diligence*) sebelum memeterai perjanjian dengan EHP, di mana beberapa konsultan profesional termasuk KPMG dan peguam telah

dilantik bagi menilai keseluruhan aspek pembelian ini. FICP juga mendapatkan pandangan dan nasihat daripada Bank Negara Malaysia, Kementerian Kewangan, Jabatan Perdana Menteri dan Kementerian Perusahaan Perladangan dan Komoditi sebelum menandatangani perjanjian-perjanjian yang berkaitan dengan pembelian saham ini.

Oleh itu, FICP telah mengambilkira pandangan-pandangan daripada pihak-pihak yang berkaitan dan dikuatkuasakan dalam terma serta syarat dalam perjanjian-perjanjian dengan pihak Rajawali bagi melindungi kepentingan khususnya FICP, FELDA dan Kerajaan Malaysia.

Sekian, terima kasih.